

- उपराष्ट्रपति जगदीप धनखड़ हर काम राष्ट्र प्रथम की भावना ऊँ करण बाबू कह्यो—झुंझुनूँ जिला रा सांगासी मांय विद्यार्थियां सागे बातचीत कीनी।
- राज्य सरकार मंदिरां की जमीं माथे भू-माफिया रा कब्जा रा वाक्यां माथे गंभीरता ऊँ विचार करेला।
- प्रधानमंत्री नरेन्द्र मोदी कह्यो—एक लाख करोड़ रुपया रा अरबन चैलेंज फण्ड ऊँ स्टार्टअप्स अर नवाचारां ने बधावो मिलेला।
- एशिया-प्रशांत हलका रो थ्री आर अर सर्कुलर इकोनामी फोरम आज जयपुर डिक्लेरेशन सागे पूरो व्हे रह्यो है।

000

उपराष्ट्रपति जगदीप धनखड़ हर काम राष्ट्र प्रथम की भावना ऊँ करण अर कर्तव्यां ने अधिकारां की तुलना मांय बत्ती तवज्जो देवण बाबू कह्यो है। श्री धनखड़ आज झुंझुनूँ जिला मांय सांगासी गांव की महात्मा गांधी सरकारी स्कूल मांय बच्चां सागे बातचीत कर रह्या हा। वे विद्यार्थियां ऊँ नाकामी ऊँ नी घबरावण की सीख देता थकां कह्यो के असफलता ही सफलता की कुंजी है।

ई दौरान विद्यार्थियां ने टेबलेट ई दिया ज्या। उपराष्ट्रपति वां की जोड़ायात सागे एक पेड़ माँ के नाम अभियान रा तहत स्कूल परिसर मांय पौधा ई रोप्या। ई मौके जिला रा प्रभारी मंत्री अविनाश गहलोत, विधायक राजेन्द्र भाम्बू अर विक्रम जाखल ई मौजूद हा।

000

राज्यपाल हरिभाऊ बागडे विश्वविद्यालयां ऊँ विद्यार्थियां की बुद्धि विकसित करण सागे भारत की देशी ज्ञान परम्परा ऊँ जुड़ी भणार्ई—लिखाई माथे जोर देवण बाबू कह्यो है। श्री बागडे आज जयपुर मांय इंदिरा गांधी राष्ट्रीय मुक्त विश्वविद्यालय—इग्नू रा दीक्षांत समारोह मांय बोल रह्या हा। राज्यपाल कह्यो के भणार्ई रो कोई शोर्टकट नी व्हे है। श्री बागडे नकल रोकण, नौकरी लेवण वाळां की बजाए नौकरी देवण वाळा बणबा की सोच विकसित करण अर मुक्त शिक्षा प्रणाली रा तैत शिक्षा नी ले सक्या लोगां ने पढ़ाई सारू प्रेरित करण माथे ई जोर दीनो। इग्नू रा क्षेत्रीय केन्द्र जयपुर की निदेशक डॉ.ममता भाटिया बतायो के आज रा जळसा मांय क्षेत्रीय केन्द्र जयपुर रा साढे छह हजार विद्यार्थियां ने उपाधियां दीरीजी।

000

लोकसभा अध्यक्ष ओम बिरला कह्यो है के बैंकिंग सेक्टर रा विकास ऊँ देश की माली बरकत तेज व्ही है अर बैंक ऊँ जुड़्या केई काम घर बैठ्यां ही कर्या जा सके है। श्री बिरला आज कोटा मांय कोटा नागरिक सहकारी बैंक लिमिटेड की दादाबाड़ी शाखा रा नुवा परिसर मांय राख्यी ज्या स्थापना समारोह मांय बोल रह्या हा। श्री बिरला कह्यो के बैंकिंग सुबीता रा विकास ऊँ सूदखोरां माथे शिकंजा कस्यो है। लोकसभा अध्यक्ष कह्यो के डिजिटल तकनीकां अर साफगोई रे जरिये सहकारी बैंक समाज रा हर तबका ने माली तौर ऊँ सक्षम बणावण मांय खास काम कर सके है।

000

संसदीय कार्य मंत्री जोगाराम पटेल आज विधानसभा मांय कह्यो के मंदिर की जमीं ने सुप्रीम कोर्ट शाश्वत भूमि मानी है अर ऐड़ी जमीं ने नी बेची जा सके है। वे कह्यो के मंदिर की जमीं पूरी तरह अदालत रा संरक्षण मांय रेहवे है। श्री पटेल सदन ने भरोसा दिरायो के सरकार मंदिर की जमीं माथे भू-माफिया कानी ऊँ कब्जा करण रा वाक्यां माथे गंभीरता ऊँ विचार करेला। उपमुख्यमंत्री दिया कुमारी विधानसभा मांय बतायो के जयपुर जिला रा शाहपुरा मांय यातायात जाम की समस्या रा निपटारा सारू राज्य सरकार शाहपुरा मांय बाईपास बणावण की संभावनावां की ठा करेला।

000

मुख्यमंत्री भजनलाल शर्मा कह्यो है के राज्य सरकार गांवांई हलका विकास माथे खास ध्यान दे रही है। वे आज जयपुर मांय वां रा रेहवास माथे राख्यी ज्यी जयपुर जिला की बजट सौगात आभार सभा मांय बोल रह्या हा। श्री शर्मा कह्यो के गांवां रो विकास प्रदेश की समृद्धि की बुनियाद है।

000

प्रधानमंत्री नरेन्द्र मोदी कह्यो है के सरकार न्यारा-न्यारा हलकां मांय निवेश सागे लोगां अर नवाचारां माथे बराबर ध्यान दीनो है। वे आज नौकरी-धंधा रा बारा मांय पोस्ट बजट वेबिनार मांय बोल रह्या हा। श्री मोदी कह्यो के लोगां मांय निवेश रो लक्ष्य तीन खंभां शिक्षा, कौशल अर स्वास्थ्य सेवा माथे निर्भर करे है। प्रधानमंत्री कह्यो के वेबिनार रो मुद्दो **लोगों, अर्थव्यवस्था और नवाचार में निवेश** विकसित भारत रा रोडमैप ने परिभाषित करे है। वे कह्यो के नौकरी-धंधा रा मौका मुहैया करावण माथे सरकार रो खास ध्यान है। प्रधानमंत्री स्टार्टअप्स अर नवाचारां ने बधावो देवण सारु एक लाख करोड़ रुपया रो अरबन चैलेंज फंड बणावण रो ऐलाण कीनो।

प्रधानमंत्री कह्यो के ई बजट मांय देशी अर अंतरराष्ट्रीय पर्यटन ने बधावो देवण सारु केई फैसला करी ज्या है, ज्यां ऊं भारत एआई रो बूतो विकसित करण सारु राष्ट्रीय वृहद भाषा मॉडल **बणावेला।**

000

केन्द्र सरकार उत्तराखण्ड मांय सोनप्रयाग ऊं केदारनाथ बीचे करीब 13 किलोमीटर लम्बो रोप-वे बणावण री मंजूरी दे दीनी है। आज नई दिल्ली मांय व्ही कैबिनेट री मीटिंग मांय ओ फैसलो करी ज्यो। सूचना अर प्रसारण मंत्री अश्विनी वैष्णव कैबिनेट री मीटिंग मांय करी ज्या फैसलां री खबरनवीसां ने जाणकारी देता थकां बतायो के रोप-वे बणावण रा काम माथे चार हजार करोड़ रुपया ऊं बत्तो खर्चो आवेला। श्री वैष्णव बतायो के ओ रोपवे बण्यां पाछे सोनप्रयाग ऊं केदारनाथ बीचे सफ़र 8 ऊं 9 घंटा ऊं कम व्हे र महज 36 मिनट रो रह जावेला। मंत्री बतायो के हेमकुंड साहिब रोप-वे ई विकसित कर्यो जावेला। श्री वैष्णव बतायो के करीब साढे बारह किलोमीटर लंबो ओ रोप-वे बणावण रा काम माथे करीब दो हजार 730 करोड़ रुपया रो खर्च आवेला।

श्री वैष्णव बतायो के सरकार पशुधन स्वास्थ्य अर रोग निवारण सारु तीन हजार 880 करोड़ रुपया खर्च करेला। ई रा तैत टीका लगावण माथे खास ध्यान दियो जावेला।

000

जयपुर मांय राख्यी ज्यो एशिया अर प्रशांत हलका रा **श्री आर अर सर्कुलर इकोनामी फोरम** रो आज समापन व्हे रह्यो है। कचरा रा प्रबंधन, निपटारा अर समावेशी भविष्य ऊं जुड़्या न्यारा-न्यारा पहलुआं माथे तीन दिन ताई करी ज्या विचार रो सार आज **जयपुर डिक्लेरेशन** रा रूप मांय जारी कर्यो जावेला। फोरम रा तहत लगायी ज्या **इंडिया पवेलियन** मांय करीब 50 स्टार्टअप्स रीसाइक्लिंग ऊं जुड़्या अनोखा उत्पाद अर तकनीक रो दरसाव कीनो। कुछ स्टार्टअप्स आकाशवाणी सागे वां रा काम अर अनुभव साझा कीना।

000

अंतराष्ट्रीय महिला दिवस सप्ताह रा तैत प्रदेश मांय भांत-भांत रा कार्यक्रम राख्या जा रह्या है। अलवर मांय आज महिलावां रो **गौरव कार्यक्रम** राख्यी ज्यो। राष्ट्रीय डेयरी विकास बोर्ड रा अध्यक्ष मिनेश शाह कार्यक्रम मांय **लखपति दीदी** बणी महिलावां रो मान कीनो। वे बतायो के सखी डेयरी रे मार्फत बारह ज़िलां मांय पशुपालन रे ज़रिये 90 हजार महिलावां ने माली तौर ऊं खुद रे पाण ऊबी करी ज्यी है। श्री शाह बतायो के सखी डेयरी ऊं जुड़ र छह हजार महिलावां लखपति दीदी बणी है।

कार्यक्रम रे दौरान श्री शाह अलवर ज़िला री कांदा अर सरसों री साखां ने दिल्ली समेत दूजा राज्यां मांय बेचण री पहल रो ऐलाण कीनो।

000

उत्तर-पश्चिम रेलवे जयपुर मंडल रा छह टेशनां माथे रेल कोच रेस्टोरेंट चलावण रो फैसलो कीनो है। जयपुर मंडल रा वाणिज्य प्रबंधक कृष्ण कुमार मीना बतायो के मुसाफिरां रा सुबीता मांय और बधोतरी सागे ई लम्बा बगत ऊं ई रेस्टोरेंट री मांग करी जा रही ही। पेश है एक रपट-

000

प्रदेश मांय घणखर ठौड़ां आज ई सीळो बायरो बाजतो रह्यो। पहाड़ी हलकां मांय पड़ी बर्फ रो असर राज्य मांय ई महसूर कर्यो जा रह्यो है। जयपुर, दौसा, अलवर अर सीकर समेत केई ठौड़ां औचक ई ठण्ड रो असर बध ग्यो। न्यारी-न्यारी ठौड़ां दिन री बगत रो तापमान सात डिग्री सेल्सियस ताई उतर ग्यो। चूरू, श्रीगंगानगर, हनुमानगढ़ अर सीकर मांय दिन री बगत तापमान 25 डिग्री सेल्सियस ऊं नीचे दर्ज करी ज्यो। मौसम विभाग रे मुजब आवता दो दिन ताई पारो और उतरण रा आसार है।

000